

## I. DISPOSICIÓNS XERAIS

### MINISTERIO DE ECONOMÍA E FACENDA

**21047** *Real decreto 2005/2009, do 23 de decembro, sobre revalorización e complementos de pensións de clases pasivas para o ano 2010.*

A Lei de orzamentos xerais do Estado para o ano 2010 contén, dentro do seu título IV e disposicións concordantes, os criterios básicos para determinar o importe das pensións públicas, e fixa, con carácter xeral, a súa revalorización de acordo co índice de prezos de consumo (IPC) previsto para o dito exercicio económico.

Mediante este real decreto desenvólvense, en materia de clases pasivas, as previsións legais recollidas na citada lei e establécese a revalorización das pensións nun un por cento, calquera que sexa a súa lexislación reguladora, salvo as excepcións legalmente previstas naquela. Así mesmo, fíxanse neste real decreto as regras e o procedemento para efectuar a revalorización.

Por outra parte, régúlase o sistema de complementos económicos para as pensións mínimas, tamén previsto na citada lei, que experimentan un incremento de entre o 2 e o 4,7 por cento, segundo a situación do pensionista e a clase de pensión de que se trate, co fin de garantir en todo momento un adecuado nivel de ingresos para os que non alcancen os importes mínimos legalmente establecidos.

Debido ás súas especiais características, nun capítulo independente establécese a revalorización das pensións de clases pasivas recoñecidas ao abeiro dos regulamentos comunitarios.

Establécese, por último, determinadas regras en relación coas novas condicións previstas para as pensións de viuvez, en supostos de divorcio ou separación xudicial, no artigo 38.2 e na disposición transitoria décimo segunda do texto refundido da Lei de clases pasivas do Estado, aprobado polo Real decreto lexislativo 670/1987, do 30 de abril, na redacción dada pola disposición derradeira décima da Lei de orzamentos xerais do Estado para 2010.

En definitiva, este real decreto dá cumprimento a través das mencionadas medidas a aquelas previsións legais, para facilitar a súa rápida aplicación en beneficio dos colectivos afectados.

Na súa virtude, por proposta da ministra de Economía e Facenda, de acordo co Consello de Estado, e logo de deliberación do Consello de Ministros na súa reunión do día 23 de decembro de 2009,

DISPOÑO:

#### CAPÍTULO I

#### **Normas xerais sobre revalorización das pensións de clases pasivas para o ano 2010**

Artigo 1. *Contía do incremento para o ano 2010 das pensións de clases pasivas.*

De conformidade co disposto no punto un do artigo 44 da Lei de orzamentos xerais do Estado para o ano 2010, as pensións aboadas por clases pasivas incrementaranse nun un por cento respecto das contías que lles correspondesen a aquelas en 31 de decembro de 2009, salvo as recollidas no título II do Real decreto 851/1992, do 10 de xullo, polo se regulan determinadas pensións extraordinarias causadas por actos de terrorismo, que se adaptarán aos importes que correspondan conforme a súa lexislación propia.

Artigo 2. *Pensións non revalorizables durante o ano 2010.*

Non obstante o disposto no artigo anterior, e en aplicación do establecido no número un do artigo 45 da expresada Lei de orzamentos xerais do Estado para o ano 2010, non experimentarán ningún incremento as seguintes pensións de clases pasivas:

a) Aquelas cuxo importe íntegro, sumado, se é o caso, ao importe íntegro mensual doutras pensións públicas percibidas polo seu titular, exceda os 2.466,20 euros íntegros en cómputo mensual cando este titular teña dereito a percibir 14 mensualidades ao ano ou, noutro suposto, os 34.526,80 euros en cómputo anual.

b) As recoñecidas a favor dos legoeiros do Estado e causadas con anterioridade ao 1 de xaneiro de 1985, con excepción daquelas cuxo titular só percíbese esta pensión por tal condición.

Artigo 3. *Pensións extraordinarias por actos de terrorismo.*

1. De acordo co establecido no artigo 45.un.a), parágrafo segundo, e no artigo 46. catro da Lei de orzamentos xerais do Estado para o ano 2010, así como no Real decreto 851/1992, do 10 de xullo, as pensións extraordinarias de clases pasivas orixinadas en actos terroristas están exentas das normas excluíntes ou limitativas recollidas no artigo 2.a) e no artigo 4.2.<sup>a</sup> deste real decreto.

2. No suposto de que, xunto con algunha das pensións mencionadas no punto anterior, determinada persoa tivese dereito a percibir en 31 de decembro de 2009 algunha ou algunhas outras pensións públicas, as normas excluíntes ou limitativas, antes citadas, si serán aplicables respecto destas últimas.

Artigo 4. *Regras para o incremento das pensións de clases pasivas.*

A aplicación do incremento establecido no artigo 1 deste real decreto axustarase ás seguintes regras:

1.<sup>a</sup> O incremento aplicarase ás pensións causadas con anterioridade ao 1 de xaneiro de 2010 sobre a contía mensual íntegra que percíbese ou lle correspondese percibir ao seu titular en 31 de decembro de 2009. Seguidamente procederase á súa actualización conforme as normas que sobre revalorización, concorrencia de pensións e limitación do seu crecemento se conteñen nas leis de orzamentos correspondentes, aplicándose para o ano 2010 o incremento procedente.

2.<sup>a</sup> Para efectos do disposto no artigo 46 da Lei de orzamentos xerais do Estado para o ano 2010, o importe da pensión ou do conxunto de pensións aboadas con cargo ao crédito de clases pasivas que perciba un mesmo titular, unha vez aplicado o incremento procedente a cada unha delas, estará limitado á cantidade de 34.526,80 euros íntegros anuais, comprendéndose na dita cantidade tanto o importe das mensualidades ordinarias como o das pagas extraordinarias que puidesen corresponder.

Nas pensións de viuvez, os incrementos por fillos que se poidan ter recoñecido ao abeiro da Lei 19/1974, do 27 de xuño, e da Lei 74/1980, do 29 de decembro, de orzamentos xerais do Estado para 1981, non se computarán, en ningún caso, para efectos da aplicación do límite máximo de percepción establecido no parágrafo anterior.

No suposto de que nun mesmo titular concorran unha ou varias pensións de clases pasivas con outra ou outras pensións públicas, o valor da pensión ou conxunto de pensións de clases pasivas terá como límite unha cifra que garde coa de 34.526,80 euros íntegros anuais a mesma proporción que a dita pensión ou pensións teñan co conxunto total de pensións públicas que perciba o seu titular.

Este límite (L) obterase mediante a aplicación da seguinte fórmula:

$$L = \frac{CP}{T} \times 34.526,80 \text{ euros anuais.}$$

onde «CP» é o valor íntegro teórico anual alcanzado en 31 de decembro de 2009 pola pensión ou pensións de clases pasivas e «T» o resultado de engadir á cifra anterior o valor íntegro en termos anuais das outras pensións públicas en idéntico momento.

3.<sup>a</sup> Establecido para cada suposto e conforme as regras anteriores o límite anual máximo dunha pensión, este límite dividirase entre o número de mensualidades ordinarias e pagas extraordinarias que, respecto da anualidade e conforme a lexislación aplicable, teñan dereito a percibir os pensionistas, e a cifra resultante constituirá o importe mensual que percibirá o titular daquela pensión en cada mensuralidade ordinaria e paga extraordinaria.

#### Artigo 5. *Procedemento para a revalorización.*

1. A revalorización das pensións de clases pasivas para 2010 será realizada de oficio pola Dirección Xeral de Custos de Persoal e Pensións Públicas do Ministerio de Economía e Facenda.

2. Esta revalorización levarase a cabo tendo en conta os datos que constan respecto de cada titular de pensión en 31 de decembro de 2009. Non obstante, e de acordo co establecido no artigo 21.2 do texto refundido da Lei de clases pasivas do Estado, aprobado polo Real decreto lexislativo 670/1987, do 30 de abril, poderase requirir calquera perceptor de clases pasivas para que facilite información respecto da súa situación económica cos efectos que nesa norma se preveñen.

3. De acordo co disposto no número tres do artigo 46 da Lei de orzamentos xerais do Estado para o ano 2010, a revalorización terá carácter provisional mentres a Administración comprobe a procedencia da percepción da súa contía, en función das outras percepcións do titular dunha pensión ou pensións e das normas en materia de concorrencia e incompatibilidade que resulten aplicables en cada caso.

Se da elevación a definitiva da revalorización anteriormente practicada se obtivese a evidencia de que se percibiron cantidades en exceso, o pensionista virá obrigado a reintegrar o indebidamente percibido. Sen prexuízo do anterior, no suposto de que o interesado cometese na súa declaración falsidade ou omisión de datos, poderanlle ser exixidas as correspondentes responsabilidades en que puidese incurrir.

## CAPÍTULO II

### Complementos para mínimos

#### Artigo 6. *Complementos económicos para as pensións de clases pasivas durante o ano 2010.*

1. De acordo coas previsións contidas nos números un, dous e tres do artigo 47 da Lei de orzamentos xerais do Estado para o ano 2010, a aplicación durante o expresado ano de complementos económicos ás pensións do réxime de clases pasivas axustarase ás seguintes regras:

a) Poderase complementar aquela pensión do réxime de clases pasivas, calquera que fose a data en que se causou, que non alcance o mínimo correspondente que figura na columna A do cadro que se inclúe no número 2 deste artigo, sempre que se recoñecese ao abeiro da lexislación xeral na materia e que o seu titular non perciba durante o exercicio de 2010 ingresos de traballo ou de capital ou que, percibíndoos, non excedan os 6.923,90 euros ao ano.

b) En caso de percibir un mesmo beneficiario varias pensións das referidas no parágrafo anterior, o complemento aplicarase, cando proceda, respecto daquela pensión que, en atención á súa natureza, teña asignado un importe maior na columna A do cadro que se inclúe no número 2 deste artigo.

c) A contía do complemento será a necesaria para que a pensión que hai que complementar, en cómputo íntegro mensual, incrementada, se é o caso, co importe íntegro mensual de todas as restantes pensións aboables con cargo ao crédito de clases pasivas

ou outras pensións públicas percibidas polo beneficiario, alcance o mínimo correspondente á columna A do mencionado cadro.

Non obstante, no suposto de que se teña recoñecida unha parte proporcional da pensión de viuvez, o complemento para mínimos aplicable, se é o caso, serao na mesma proporción que se tivo en conta para o recoñecemento da pensión.

O importe que hai que ter en conta será, para as pensións de clases pasivas, o que resulte unha vez revalorizadas estas de acordo co disposto neste real decreto, e para as restantes pensións de carácter público, o que estea percibindo o beneficiario no momento de presentar a solicitude de iniciación do procedemento en materia de complementos económicos a que se refire o número 2 do artigo seguinte.

Non obstante o disposto no parágrafo anterior, para os únicos efectos de garantía de complementos para mínimos, equiparanse a rendas de traballo as pensións públicas que non estean a cargo de calquera dos réximes públicos básicos de previsión social, así como as pensións percibidas con cargo a unha entidade estranxeira, coa excepción establecida no número 3 do seguinte artigo 9 relativa ao complemento de garantía das pensións recoñecidas ao abeiro dos regulamentos comunitarios.

d) O complemento minorarase, ou se é o caso suprimirase, na contía necesaria para que a suma, en termos anuais, da pensión complementada segundo o disposto no parágrafo anterior, xunto con todas as rendas de traballo ou substitutorias destas ou de capital, percibidas polo beneficiario, non supere o límite correspondente da columna B do cadro que figura a continuación.

Para estes efectos, o concepto de renda definirase conforme a lexislación do imposto sobre a renda das persoas físicas, aínda que se terán en conta, en todo caso, os ingresos correspondentes a calquera pensión de carácter público, estean estas sometidas ou non ao mencionado imposto; as pensións de clases pasivas tomaranse no seu valor anual unha vez revalorizadas conforme o disposto neste real decreto; as restantes pensións públicas terán o valor anual que corresponda no momento de presentar a solicitude de iniciación do procedemento en materia de complementos económicos, referida no número 2 do seguinte artigo; e as rendas de traballo e de capital tomaranse no valor percibido no ano 2009, debéndose excluír as deixadas de percibir por motivo do feito causante das distintas pensións, así como aquelas que se probe que non deben ser percibidas no ano 2010.

Tamén se computarán entre tales ingresos as plusvalías ou ganancias patrimoniais, valoradas conforme a lexislación fiscal.

2. Para os efectos do disposto no punto anterior teranse en conta as seguintes contías:

|   | A<br>Pensión mínima<br>mensual<br>—<br>Euros | B<br>Ingresos anuais<br>máximos<br>—<br>Euros |
|---|--|---|
| Pensión de xubilación ou retiro cando existe cónxuxe a cargo do titular . . . . .                                     | 725,20                                       | 17.076,70                                     |
| Pensión de xubilación ou retiro sen cónxuxe: unidade económica unipersoal . . . . .                                   | 587,80                                       | 15.153,10                                     |
| Pensión de xubilación ou retiro con cónxuxe non a cargo . . . . .   | 557,50                                       | 14.728,90                                     |
| Pensión de viuvez . . . . .   | 587,80                                       | 15.153,10                                     |
| Pensión ou pensións en favor doutros familiares, sendo «n» o número de beneficiarios da pensión ou pensións . . . . . | <u>572,80</u><br>n                           | 6.923,90 + $\frac{8.019,20}{n}$               |

No suposto de pensión ou pensións en favor doutros familiares que fosen percibidas por varios beneficiarios, a cifra resultante da columna A do cadro anterior non será inferior a 179,40 euros mensuais, respecto de cada un daqueles beneficiarios cuxos ingresos anuais non superen os que figuran na columna B. Non obstante, cando algún dos beneficiarios sexa orfo discapacitado menor de 18 anos cunha discapacidade en grao igual ou superior ao 65 por cento, a contía mínima que se lle recoñecerá ao dito orfo será de 353,20 euros mensuais, sempre que cumpra o requisito de límite de ingresos citado.

Nas pensións de viuvez, os incrementos por fillos que se poidan ter recoñecido ao abeiro da Lei 19/1974, do 27 de xuño, e da Lei 74/1980, do 29 de decembro, non se computarán para efectos da aplicación do mínimo establecido no cadro anterior.

Para idénticos efectos, entenderase que existe cónxuxe a cargo do titular cando este estea convivindo co pensionista e dependa economicamente del. Presumirase a convivencia sempre que se conserve o vínculo matrimonial, sen prexuízo de que esta presunción se poida destruír de a Administración comprobar o contrario, e para os mesmos efectos entenderase que existe dependencia económica cando os ingresos do cónxuxe, por calquera concepto, non superen o salario mínimo interprofesional vixente.

3. Os complementos económicos regulados neste precepto, que se aboarán en doce mensualidades ordinarias e dúas extraordinarias, todas elas de igual contía, non serán en ningún caso consolidables e serán absorbibles por calquera futuro incremento que poidan experimentar as percepcións do interesado, xa sexa por revalorización ou polo recoñecemento no seu favor de novas pensións públicas.

4. De conformidade co disposto no artigo 21.5 do Real decreto 1288/1990, do 25 de outubro, poderán acceder ao dereito a mínimos os beneficiarios de pensión de clases pasivas que a obtivesen ao abeiro da expresada norma.

#### Artigo 7. *Procedemento en materia de complementos económicos.*

1. Correspóndelle á Dirección Xeral de Custos de Persoal e Pensións Públicas recoñecer e determinar os complementos económicos que procedan, de acordo co establecido no precedente artigo 6.

2. O procedemento iníciarase por petición do interesado mediante solicitude dirixida á Dirección Xeral de Custos de Persoal e Pensións Públicas. Esta solicitude axustarase e cubrirase de acordo co modelo establecido para o efecto.

3. Á vista dos datos consignados polo solicitante do complemento económico e, se é o caso, da consulta informática ao Rexistro de Prestacións Sociais Públicas, a oficina administrativa ditará, sen máis trámites, a resolución que proceda, sen prexuízo de que esta sexa revisable en calquera momento, en atención á comprobación ou inspección dos datos consignados ou á variación dos elementos condicionantes do dereito ao complemento.

Se a solicitude dos complementos económicos se formulase, por vez primeira, durante este exercicio, os seus efectos económicos retrotraeranse, como máximo, ao 1 de xaneiro de 2010 ou á data de arrinque da pensión se esta fose posterior.

Non obstante, se a solicitude de tal recoñecemento se efectuase con ocasión de exercer o dereito ao cobramento da pensión, os efectos económicos poderán ser os da data de arrinque daquela, cunha retroactividade máxima dun ano desde que se soliciten e sempre que se reúnan os requisitos necesarios para a súa percepción.

4. Se, unha vez recoñecidos os complementos económicos, se comprobase a existencia dalgunha contradicción entre os datos declarados e a realidade, o solicitante virá obrigado ao reintegro do indebidamente percibido, sen prexuízo de que se deduzan na súa contra outras posibles responsabilidades de acordo co ordenamento xurídico.

Para efectos da dita revisión, e de acordo co disposto no artigo 21 do vixente texto refundido da Lei de clases pasivas do Estado, o pensionista deberalle facilitar á Administración a información que lle sexa formalmente requirida, e poderase suspender o pagamento do complemento en caso de incumprimento desta obriga.

5. O receptor dos complementos de pensión virá obrigado a poñer en coñecemento da Administración, no momento de se producir, calquera variación na composición ou contía dos ingresos declarados na solicitude, así como calquera variación do seu estado civil ou da situación de dependencia económica do seu cónxuxe respecto do inicialmente declarado. O incumprimento desta obriga, se del se seguise a percepción indebida de cantidades, dará orixe ao reintegro destas.

6. Queda facultada a Dirección Xeral de Custos de Persoal e Pensións Públicas para ditar cantas instrucións de servizo puidesen resultar convenientes para axilizar os trámites para a percepción dos complementos a que se refire este artigo.

Artigo 8. *Prohibición de concesión de complementos económicos en clases pasivas.*

1. No suposto de que un pensionista de clases pasivas teña dereito a percibir, de acordo coas normas deste real decreto, un complemento económico, e por ser beneficiario ademais doutras pensións públicas, aboadas con cargo a réximes públicos de previsión diferentes, teña así mesmo dereito a algún outro complemento, conforme o disposto nos artigos 47 e 48 da Lei de orzamentos xerais do Estado para o ano 2010, non poderá percibir o complemento correspondente á pensión de clases pasivas salvo nos seguintes casos:

a) Cando as pensións dos distintos sistemas sexan da mesma natureza e o importe íntegro mensual da pensión de clases pasivas sexa de superior contía ao importe correspondente á outra pensión pública susceptible de ser complementada.

b) Cando as pensións que percibirá o interesado sexan de distinta natureza e o importe mínimo mensual de pensión correspondente á de clases pasivas sexa de maior contía que o da outra pensión pública.

2. Nos dous supostos recollidos no punto anterior non se poderá tomar en consideración o complemento económico a que puidese ter dereito o interesado pola pensión allea ao réxime de clases pasivas, para determinar o importe do complemento que polo dito réxime lle corresponda, conforme as regras do artigo 6 deste real decreto.

### CAPÍTULO III

#### **Pensións recoñecidas ao abeiro dos regulamentos comunitarios en materia de seguridade social**

Artigo 9. *Revalorización das pensións recoñecidas ao abeiro dos regulamentos comunitarios en materia de seguridade social.*

1. A revalorización das pensións recoñecidas ao abeiro dos regulamentos comunitarios, das cales estea a cargo do réxime de clases pasivas un tanto por cento da súa contía teórica, levarase a cabo aplicando o dito tanto por cento ao incremento que correspondese de se encontrar a cargo do citado réxime o 100 por cento da pensión.

2. Á pensión rateada, unha vez revalorizada de acordo co disposto no número anterior, engadiráselle, cando así proceda en aplicación das normas xerais establecidas, o complemento para mínimos que corresponda conforme as normas contidas no capítulo II deste real decreto. Este complemento calcularase aplicando a mesma porcentaxe que se tivo en conta para o recoñecemento da pensión á diferenza resultante entre a contía que correspondese de se encontrar a cargo do réxime de clases pasivas o 100 por cento da pensión e o mínimo establecido para a prestación de que se trate.

3. Se despois de ter aplicado o disposto no punto anterior, a suma dos importes reais das pensións recoñecidas, tanto en virtude da lexislación española como estranxeira ao abeiro dos regulamentos comunitarios, fose inferior ao mínimo que corresponda á pensión de que se trate, garantiráselle ao beneficiario, mentres resida en territorio nacional, a diferenza necesaria ata alcanzar o referido mínimo, de acordo coas normas xerais establecidas para a súa concesión.

Disposición adicional primeira. *Complementos para mínimos e actualización doutras pensións de clases pasivas.*

1. Para o ano 2010 aplicaranse os complementos económicos regulados no capítulo II deste real decreto ás pensións de orfandade recoñecidas ao abeiro do título II da Lei 37/1984, do 22 de outubro, de recoñecemento de dereitos e servizos prestados a aqueles que durante a guerra civil formaron parte das Forzas Armadas, Forzas de Orde Pública e Corpo de Carabineiros da República; así como ás recoñecidas a favor de orfos non incapacitados maiores de 21 anos, causadas por persoal non funcionario ao abeiro das leis 5/1979, do 18 de setembro, sobre recoñecemento de pensións, asistencia médico-

farmacéutica e asistencia social a favor de viúvas, fillos e demais familiares dos españois falecidos como consecuencia ou con ocasión da pasada guerra civil; e 35/1980, do 26 de xuño, sobre pensións aos mutilados ex-combatentes da zona republicana; e a aquelas outras causadas polos operarios de lotarías, o persoal das minas de Almadén e os facultativos sanitarios inutilizados ou falecidos con motivo de servizos extraordinarios en época de epidemia, e subdelegados de Sanidade a que se refire a Lei do 11 de xullo de 1912.

2. As pensións en favor de familiares concedidas ao abeiro da Lei 5/1979, do 18 de setembro, e da Lei 35/1980, do 26 de xuño, con excepción das pensións de orfandade a que se refire o punto anterior, así como da Lei 6/1982, do 29 de marzo, de pensións aos mutilados civís de guerra, e as pensións de viuvez do título II da Lei 37/1984, do 22 de outubro, calquera que sexa a súa data inicial de aboamento, non poderán ser inferiores no ano 2010 ao importe establecido, para o citado exercicio económico, como de contía mínima no sistema da Seguridade Social para as pensións de viuvez de titulares maiores de sesenta e cinco anos.

Disposición adicional segunda. *Adaptación de oficio dos complementos para mínimos.*

1. As pensións de clases pasivas ás cales se aplicasen complementos económicos durante o ano 2009 adaptaranse de oficio, e con carácter provisional, con efectos do 1 de xaneiro de 2010, ás contías establecidas no artigo 6 deste real decreto, presumíndose que os seus titulares reúnen as condicións e requisitos exixidos no dito precepto, ata que os servizos administrativos correspondentes comprobren a concorrencia destas condicións e requisitos.

2. Se da comprobación antes citada se deduce a ausencia dalgún requisito ou condición, procederá o cesamento inmediato no aboamento do complemento, con reintegro do indebidamente percibido por tal concepto desde, como máximo, o primeiro de xaneiro do ano 2010. Igualmente, se da dita comprobación derivase a necesidade de modificar a contía do complemento, practicarase a oportuna modificación, con reintegro do indebidamente percibido desde a data antes indicada.

Non obstante, e de acordo co establecido no artigo 7.4 deste real decreto, procederá retrotraer o reintegro do indebidamente percibido á data inicial en que o complemento económico se comezou a aboar en exercicios anteriores, ata un máximo de catro anos, se da comprobación efectuada resultase a evidencia de que o perceptor daquela cometeu algunha omisión ou falsidade na declaración presentada ao momento de solicitar a aplicación do complemento, sen prexuízo das responsabilidades en que puidese incurrir.

Disposición adicional terceira. *Actualización de importes de determinadas pensións.*

Para o cálculo das pensións de xubilación ou retiro e de viuvez do réxime de clases pasivas do Estado que se causen durante 2010 ao abeiro da lexislación vixente en 31 de decembro de 1984, a contía inicial que corresponda corríxirase mediante a aplicación da porcentaxe do 1 e 2 por cento, segundo proceda, establecido para os anos 2004, 2006, 2007 e 2008 no punto catro das disposicións adicionais quinta e sexta, así como da disposición adicional décima, das leis 61/2003, do 30 de decembro, 30/2005, do 29 de decembro, 42/2006, do 28 de decembro, e 51/2007, do 26 de decembro, de orzamentos xerais do Estado para o ano 2004, 2006, 2007 e 2008, respectivamente.

Para tal efecto, computarase a mellora por fillo a cargo que poida corresponder nas pensións de viuvez por aplicación das leis 19/1974, do 27 de xuño, e 74/1980, do 29 de decembro.

Disposición adicional cuarta. *Actualización das axudas sociais do Real decreto lei 9/1993, do 28 de maio, polo que se conceden axudas aos afectados polo virus de inmunodeficiencia humana (VIH) como consecuencia de actuacións realizadas no sistema sanitario público.*

De acordo co establecido na disposición adicional oitava da Lei de orzamentos xerais do Estado para o ano 2010, as contías mensuais das axudas sociais, en favor das persoas

que resultaron contaminadas polo virus de inmunodeficiencia humana (VIH), reguladas nas alíneas b), c) e d) do artigo 2.1 do Real decreto lei 9/1993, do 28 de maio, determinaranse mediante a aplicación das proporcións reguladas nas letras citadas sobre o importe de 587,61 euros.

Disposición adicional quinta. *Pensións de viuvez en supostos de divorcio ou separación xudicial.*

De conformidade co establecido na disposición derradeira décima.Un da Lei de orzamentos xerais do Estado para 2010, o importe da pensión de viuvez, ou da prestación temporal, que poida corresponder á vítima de violencia de xénero non se reducirá, en ningún caso, aínda cando a vítima fose acreedora da pensión compensatoria a que se refire o artigo 97 do Código civil.

Disposición transitoria única. *Pensións de viuvez en supostos de divorcio ou separación xudicial anteriores ao 1 de xaneiro de 2008.*

1. Co fin de dar cumprimento á regulación contida na disposición derradeira décima. Dous da Lei de orzamentos xerais do Estado para 2010, revisaranse por instancia de parte as solicitudes que se denegasen por non acreditar o requisito de ser beneficiarios da pensión compensatoria prevista no artigo 97 do Código civil.

2. Os efectos económicos das revisións que se efectúen e das novas solicitudes retrotraeranse ao 1 de xaneiro de 2010, sempre que a petición se formule durante o primeiro semestre do referido ano. Transcorrido este período, a pensión producirá efectos a partir do día primeiro do mes seguinte ao da solicitude.

3. As pensións de viuvez que se recoñezan ao abeiro da disposición transitoria décimo segunda do texto refundido da Lei de clases pasivas do Estado non determinarán, en ningún caso, a redución dos dereitos xa recoñecidos no momento da entrada en vigor deste real decreto a favor doutros beneficiarios de pensións familiares derivadas do mesmo causante.

Disposición derradeira primeira. *Habilitación para disposicións de desenvolvemento.*

Autorízase a vicepresidenta segunda do Goberno e ministra de Economía e Facenda para que dite as disposicións de carácter xeral que resulten necesarias para a aplicación deste real decreto.

Disposición derradeira segunda. *Entrada en vigor e efectos económicos.*

Este real decreto entrará en vigor o día 1 de xaneiro de 2010 con efectos económicos desta mesma data.

Dado en Madrid o 23 de decembro de 2009.

JUAN CARLOS R.

A vicepresidenta segunda do Goberno  
e ministra de Economía e Facenda,  
ELENA SALGADO MÉNDEZ